

Splikashon di formulario kaso Gato (Mal Pais)

Lei

Basá riba e artíkulonán di lei 200a y siguiente di buki 3 di Kódigo Sivil di Kòrsou, Korte por repartí un tereno ku ta forma parti di un herensia no repartí entre di esnan ku ta hasiendo uzo di e tereno. E personanan aki nos ta yama un usuario.

Artíkulo 200b di buki 3 di Kódigo Sivil di Kòrsou ta bisa ku un usuario ta un persona ku ta biba legal riba Kòrsou i ku ta hasi uzo di e tereno pa por lo ménos 10 aña. Den kasonan eksepsional korte por disidí ku un hende ku ta uza e tereno pa ménos ku 10 aña por bini na remarke pa haña e tereno ku e ta uza. E kuestionario aki tin komo meta pa stipulá ken ta hasiendo uzo di tereno den Gato. Korte por disidí ku aunke un hende no ta hasi uzo di e tereno, tòg dor di su historia òf konekshon ku e tereno e por bin na remarke pa haña esaki.

Prueba bo derechi

E echo ku un persona ta haña ku e mester haña e tereno ku e ke na Gato no ta suficiente pa Korte honra su petishon. Bo tin e derechi ora ku bo por prueba esei. Ta p'esei na sierto preguntanan tin un strea, indikando ku bo mester pone kopia di un dokumento ku ta prueba bo kontesta. Por ehèmpel na e parti di "Personalía" mester pone un kopia di un karchi di identifikashon bálido. Si bo no tin esaki bo por pone un kopia di bo rèibewèis bálido tambe. Pa loke ta e otro preguntanan mester entregá un ekstrakto ("uittreksel") di Kranshi kaminda por mira ku bo ta inskribí na e adrès na Gato kaminda ku bo ke haña e tereno. Importante ta pa bo prueba tambe e durashon ku bo ta biba na e tereno.

P'esei pidi Kranshi un ekstrakto kaminda tin pará ariba for di ki tempu bo ta inskribí na e adrès ei. Si bo no ta inskribí na e adrès ei na Kranshi òf Kranshi no tin informashon for di kua fecha bo ta inskribí na e adrès lo bo por entregá otro dokumentonan ku por prueba ku abo ta hasi uzo di e tereno ku bo ke yega na remarke p'e. Lo bo por entregá por ehèmpel diferente resibunán di awa y koriente òf otro pòst riba bo nòmber.

Por entregá tambe karta di diferente hende, ku nan firma i kopia di sédula, adrès i number di telefòn, ku ta fungi komo testigu pa bisa ku nan sa ku bo ta hasi uzo di e tereno pa e temporada ku bo ta indiká. Den kaso ku bo opta pa esaki tene na kuenta ku bo mester entregá mas ku un deklarashon. I e persona ku ta duna su deklarashon por eskrito mester bisa den su deklarashon ta kon bini nan sa loke nan ta deklará. Semper ta mas mihó pa bo entregá mas ku un prueba ya asina bo tin mas sigur ku bo a prueba bo derechi.

Por resultá ku e tereno ta kai den un herensia òf ta wòrdu uzá pa mas hende. Por ehèmpel tin mas hende den e kas ku ta biba ku bo. Pregunta 5 ta relashoná ku esaki. Den kaso ku ta trata un

herensia mester bini ku kopia di un dokumento ofisial den kua tin pará ta ken ta herederonan di e persona ku a laga e propiedat atras. Na momento ku tin mas heredero òf otro hende ku ta uza e kas ku ta mayor di edat mester pone huntu ku e formulario tambe un deklarashon firmá dor di e otro heredero(nan) òf e otro persona(nan), ku kopia di sédula, adrès y number di telefòn, den kua tin pará ku e (nan) ta duna abo e derechi pa bin na remarke pa haña e tereno.

E personanan ku no ta hasiendo uzo (mas) di e tereno ku nan a apliká p'e tambe mester prueba e derechi ku nan ta kere ku nan tin pa haña e tereno. Loke a wòrdu spliká aki riba ta konta pa nan tambe.